

ԳԱՌՆԻԻ ՃԱԿԱՏԱՄԱՐՏԻ ՊԱՏՄՈՒԹՅԱՆ ՇՈՒՐՋ

ՀԱՅՐԱՊԵՏ ՄԱՐԳԱՐՅԱՆ

Վերջին խորեզմշահ Ջալալ աղ-Դինի (1220—1231) արշավանքներն Անդրկովկաս՝ մոնղոլական արհամիրքներին անմիջապես նախորդող ամենակարևոր իրադարձություններն են XIII դ. երկրորդ տասնամյակի Հայաստանի և Վրաստանի պատմության մեջ: Խորեզմյան զորաբանակի յոթնամյա ռազմական գործողությունները տնտեսական, քաղաքական և ռազմական տեսակետներից զգալիորեն թուլացրին Անդրկովկասը, որոշ չափով ազդեցին նաև սոցիալական պրոցեսների ընթացքի վրա ու ծանր հետևանքներ ունեցան Անդրկովկասյան ժողովուրդների համար:

Հայաստանում և Վրաստանում Ջալալ աղ-Դինի հետագա ձեռնարկումների համար բախտորոշ նշանակություն ունեցավ Գառնիի ճակատամարտը՝ մեծ չափով պայմանավորելով խորեզմշահի ապագա հաջողությունները: Չնայած Ջալալ աղ-Դինի արշավանքների պատմությանը հատկացված ուշադրությանը, այդ կարևորագույն իրադարձությունն առայժմ չի արժանացել հատուկ քննության: Մասնագիտական գրականության մեջ այսօր էլ տարբեր, երբեմն հակասական տեսակետներ են հայտնվում ճակատամարտի ճշգրիտ ժամանակի, ընթացքի, մասնակից կողմերի ուժերի հարաբերության, հայվրացական բանակի պարտության պատճառների, հետևանքների և այլ հարցերի վերաբերյալ, ուստի այդ խնդիրների վերստին արժարժումը կարևոր է:

Մոնղոլների կողմից իր հայրենիքից հալածված խորեզմշահը Հայաստան ներխուժեց 1225 թ., Ատրպատականից¹, «գերելու և ավերելու Դվինն ու շրջակա երկրները»²: Նորահայտ թշնամու գեմ ճակատամարտելու համար Ռուսուդան թագուհին (1223—1245) ուղարկեց ամբաստանապետ Սիմեոն Ջաքարյանին, որը, «ժողովեալ... զամենայն զոյժ և զօրութիւն Հայոց և Վրաց»³, վճռական մարտի ելավ Կոտայք գավառում, Գառնի գյուղաքաղաքի մոտ: Հայ-վրացական բանակի հաղթանակը կնշանակեր պարտության մատնել և արտաքսել թշնամուն, իսկ Ջալալ աղ-Դինի հաջողությունը նրան թույլ կտար շարժվել ուղղակի Թբիլիսիի վրա:

Սկզբնաղբյուրները բավական տվյալներ են ընձեռում՝ պարզելու հակառակորդ զորաբանակների թվաքանակը: Ըստ Իբն ալ-Ասիրի, հայ-վրացական

¹ «Հաւարումն Պատմութեան Վարդանայ վարդապետի», Վենետիկ, 1862, էջ 143, «Պատմութիւն նահանգին Սիսական, արարեալ Ստեփաննոսի Օրբելեան արքեպիսկոպոսի Սիւնեաց», Թիֆլիս, 1910, էջ 399:

² «Վրաց ժամանակագրություն», թարգմանությունը հին վրացերենից, առաջարանը և ծանոթագրությունները Պ. Մուրադյանի, Երևան, 1971, էջ 59:

³ Ստեփանոս Օրբելյան, էջ 399: